

Izjava: Visoki predstavnik pozdravlja odluku ministara inostranih poslova EU

Visoki predstavnik Paddy Ashdown je danas uputio čestitke predsjedavajućem Vijeća ministara Adnanu Terziću, direktoru Direkcije za evropske integracije Osmanu Topčagiću i drugim važnim ličnostima u Bosni i Hercegovini. Čestitke su upućene u povodu odluke koje su ministri vanjskih poslova Evropske unije donijeli na sastanku u Briselu i prihvatili preporuku Evropske komisije od 21. oktobra da Evropska unija otpočne pregovore o stabilizaciji i pridruživanju sa Bosnom i Hercegovinom.

Visoki predstavnik je primijetio da je mukotrpan proces administrativnih i zakonodavnih reformi koji je doveo Bosnu i Hercegovinu u ovu poziciju pokrenut zahvaljujući saradnji među strankama i pragmatičnom kompromisu. Visoki predstavnik je rekao da su u svakoj zemlji koja se uspješno pridružila Evropskoj uniji vlada i opozicione stranke ujedinili snage u promoviranju procesa neophodnog za postizanje uspjeha na putu ka Evropi.

«Svaki pojedini građanin može imati koristi od mogućnosti koje se otvaraju otpočinjanjem pregovora o stabilizaciji i pridruživanju,» izjavio je visoki predstavnik. « Političko vodstvo mora osigurati da te koristi budu najveće moguće a obećanja ispunjena što je prije moguće. Ovaj proces ne treba biti odlagan razmiricama među strankama ili narodima.»

«Sada je od apsolutnog značaja da Bosna i Hercegovina ozbiljno pristupi otpočinjanju pregovora oko stabilizacije i pridruživanja. Finalizacija zakona koji se tiču javnog rtv servisa i ispunjavanje rokova koje su parlamenti u BiH sami sebi postavili u vezi sa reformom policije će predstavljati prvi test koji će Evropska unija primijeniti», rekao je visoki predstavnik.